

## Aidil Adha

Waduh,  
Udah ku rasa semalam tangan Ibrahim mengurut  
ku tenung matanya  
dan mata Ismail bersinar  
suria di senja mencerah serikan  
benua tempang dalam tangan tuhan.

Di sana  
Di antara Safa' dan Marwah  
dua bukit setentang  
Siti Hajar berlari lesu  
anak seorang perlukan minum  
dan air tiada apakan daya?

Ismail putera pilihan  
anak Ibrahim zuriat sanjungan  
terlahir ke dunia diperutuskan  
bebaskan manusia dari kesesatan.

Dari tumit tempat dibaringkan  
terpancут keluar air kejernihan  
kepalang ketawa si ibu seorang  
kolam kecil dibataskan  
dinamakan zam-zam.

Itulah Ismail dan bondanya  
itulah Ismail dan ceritanya  
sampai musim cubaan datang  
Ismail comel mesti dikorbankan.

Atas keikhlasan anakanda dan bonda  
nyawa sekutul tiada harga  
kalau perlu dan demi Tuhan  
nah, wahai bapaku  
ini leherku, sembelihanlah!

Cerita itu menyayatkan aku  
dalam mimpi ku tangis sendu  
esok Aidil Adha tiba  
kan ku junjung hikmat mulia!

## Di Bawah Sayap Aidil Adha

Di bawah sayap Aidil Adha  
yang dunia kelmarin ku renung  
dalam kesamaran tekad  
dan kepudaran semangat  
semacam ku mimpikan  
Baitul Maqdis sudah ku genggam.

Di bawah sayap Aidil Adha  
hari kita para Muslim berbicara  
sampai ke mana sudah jasa kita  
buat agama  
dan umatnya.

Di bawah sayap Aidil Adha  
ku senyumkan untuk diri  
hari esok yang datang  
bukan lagi hari Zionis  
tetapi hari persatuan Islam  
dan Masjid al-Aqsa sudah ku rampas  
seperti muka para dajal yang ditampar  
atas dasar keimanan.

Di bawah sayap Aidil Adha  
marilah bersama kita berpesta  
kita bacakan kembali sajak-sajak ciptaan aulia  
kita kaji siapa kita  
antara mereka  
para shuhada dan bapa-bapa perjuangan  
seperti Ibrahim, Ismail dan Muhamad  
seperti Siti Hajar, Aminah dan Khadijah  
dan atas apa kita tegak kini  
dengan dada yang kontang  
dari serba yang mendebaran.

Di bawah sayap Aidil Adha  
maka hari inilah mesti kita tentukan  
bila lagi ini dunia mesti kita kebelakangkan  
dan sampai bila kita mesti berwirid tanpa pegangan?

# Sistem Ekonomi Sosialisme

(II)

Sebagai menyambung kajiannya dalam memperkatakan soal “Sistem Ekonomi Sosialisme” penulis makalah ini meneruskan bahasannya dengan membawa para pembaca sekalian meninjau ke arah dua sistem ekonomi yang terpenting untuk dijadikan panduan hidup manusia menghadapi zaman perlumbaan mengejar kemajuan di lapangan ekonomi.

Di dalam makalah ini saudara Miza Lutfi akan memperbandingkan dua jenis aliran ekonomi lagi iaitu berbentuk: *Co-operative Sosialism* dan *Islamic Sosialism*. Ikutilah seterusnya bahasan dan kajian beliau yang berharga ini.- Pengarang.

Oleh: Miza Lutfi- Nilam Puri

## 4. Ekonomi Sosialisme

### Tolong-menolong:

Dasar tolong-menolong adalah menjadi tujuan yang utama dalam sistem ekonomi sosialisme tolong-menolong (*Co-operative socialism*). Ekonomi Sosialisme tolong-menololong ini sama dengan ekonomi dalam lain-lain sistem, iaitu sama-sama berusaha mempergunakan bahan-bahan tabii dan kekayaan negara untuk kebahagiaan orang ramai. Tolong menolong di atas dasar ikhtiar dan usaha sendiri dapat memberi perkhidmatan yang penting kepada orang ramai.

Dalam sistem ini perniagaan dan pertanian adalah merupakan unsur yang terpenting untuk mencapai kehidupan yang sempurna. Mengikut sosialisme ini juga kegiatan ekonomi apabila dilakukan di atas dasar tolong-menolong adalah merupakan sebaik sistem yang dapat mencabar sistem ekonomi kapitalis bebas. Tanpa pengorbanan yang besar dari hak-hak milik perseorangan dan

juga dari sistem demokrasi.

Profesor “Florence” berpendapat bahawa: Tolong-menolong dalam sistem ekonomi bebas (*Laissez Faire Liberalism*) Tidak sama dengan tolong-menolong di dalam sistem ekonomi sosialism tegas, yang seratus-peratus bercorak sosialis, kerana dasar sosialisme tegas adalah merupakan dasar paksa, sedangkan konsep tolong-menolong banyak memberi kebaikan daripada sistem ekonomi tegas yang merampas hak-hak milik perseorangan dengan jalan paksa dan kekerasan, kerana dasar paksa dan kekerasan adalah merupakan dasar penghapusan kecergasan ekonomi terhadap hak-hak perseorangan.

Dari konsep sosialisme ini perkumpulan ramai tidak boleh menceroboh ke atas hak-hak perseorangan dan kerajaan cuma memain peranan yang terhad sahaja dalam sistem ini.

Sebagaimana dasar utama dari

sistem ekonomi tolong-menolong ialah untuk meyakinkan demokrasi tulen daripada apa yang terkandung dalam demokrasi kapitalisme dan demokrasi sandangan. Dan setengah dari tujuan dasar tolong-menolong juga ialah untuk membasmikan perlonggokan (monopoli) harta dan bagi menghadapi sebarang masalah yang timbul darinya.

Di setengah-setengah negeri, walaupun agak kurang, tetapi sosialisme ini telah berjaya membentuk satu sistem ekonomi yang radikal, di sana-sini banyak sekali muncul rancangan-rancangan istimewa yang dapat menggantikan pengaruh kekuasaan sebagaimana yang berlaku di Uganda dalam bidang penggunaan.

Sistem tolong menolong dalam bidang penggunaan di negeri Inggeris telah banyak menjadi kenyataan dan berjaya membentuk satu dasar ekonomi yang kuat khususnya dalam bidang pasaran jualan berkomplot dan jualan pukul rata. Banci pada tahun 1958 menunjukkan bahawa sistem tolong-

## Sistem Ekonomi...

menolong dalam bidang penggunaan telah mencapai kepada angka 26% daripada jumlah semua hasil-hasil seluruh negara, selain daripada sumber-sumber penghasilan yang lain.

Walaupun di sana ada sistem tolongan-menolong di setengah-setengah negeri yang lain, tetapi sistem itu tidak dapat menghasilkan sebarang faedah kepada ekonomi negara, kerana kepincangan dasar dan asas-asas tolongan-menolong itu sendiri, untuk mengelakkan dari kegagalan harus diberi perhatian kepada sebab-sebab yang berikut:

1. Pengertian makna demokrasi yang sebenar tidak seimbang dengan dasar tolongan-menolong, sedangkan sistem tolongan-menolong merupakan satu pakatan yang besar, yang sama-sama mengambil bahagian yang cergas dalam bidang ekonomi. Untuk tujuan yang tersebut maka tiap-tiap anggota masyarakat seharusnya mengambil sikap berpadan-padaan dalam perbelanjaan makan minum, pakaian dan segala-gala kepentingan diri sendiri. Dan hendaklah meletakkan sifat bertimbang rasa dan bantu-membantu di hadapan dari segala-gala yang lain, di samping itu galakkan-galakkan harus diberi kepada anggota masyarakat supaya mereka menyedari dan membiasakan diri mereka dengan kewajipan-kewajipan yang tertentu yang terletak di atas bahu masing-masing. Dan konsep tolongan-menolong ini juga harus di tanam dengan akidah-akidah dan ideologinya bersekali, semoga dengan itu sistem itu pasti akan mencapai kejayaan.

2. Kerja-kerja patut diberi kepada orang yang benar-benar berkelayakan dan mahir di dalam satu-satu hal yang tertentu. Lebih-lebih lagi dalam sistem ini memang berkehendakkan kepada keadaan begitu. Di samping itu dasar-dasar yang tegas harus dititik beratkan dalam sistem ini, seperti atas jualan hendaklah dengan harga pasaran yang berpatutan. Konsep demokrasi patut dijadikan dasar utama dalam segala lapangan. Sudi menerima pelanggan-pelanggan baru yang suka bergotong-royong dalam sistem ini, dan sama-sama mendapat hak dan layanan dalam mengambil faedah dan sebagainya.

3. Seyogia bagi perkumpulan-perkumpulan ekonomi sosialisme ini mengubah dasar-dasar yang lapuk supaya bersesuai dengan keadaan yang baru, dan hendaklah sentiasa berusaha bagi mengelakkan sebarang pertelingkahan yang boleh menimbulkan kacau-bilau dalam sistem ini.

4. Berikhtiar untuk menurunkan harga-harga saham dalam sistem ekonomi kapitalisme, di negeri Inggeris misalnya: Harga saham yang harus dibayar oleh seorang yang suka memasuki perkumpulan-perkumpulan pertolongan dengan harga yang murah sekali iaitu sekadar satu syiling, itupun syarikat-syarikat kerjasama dan tolongan-menolong meletakkan juga saham-saham kepada pemilik-pemiliknya yang tertentu itu.

5. Menyediakan bekalan perusahaan yang berasingan, supaya dapat memberi kemudahan kepada orang ramai untuk mendapat penghidupan yang sempurna. Dan mungkin inilah sebab-sebab kejayaan sosialisme tolongan-menolong ini di setengah-setengah negeri seperti Inggeris dan Belanda

Itulah sebahagian dari faktor-faktor yang boleh menjayakan konsep tolongan-menolong dalam sistem sosialisme ini.

### 5. Ekonomi Sosialisme

#### Islam:

Islam selaku agama besar, agama yang diturunkan oleh Tuhan dari langit untuk kebaikan seluruh manusia. Maka sangat wajarlah Islam mempunyai dasar ekonomi yang lengkap, dasar ekonomi yang sempurna buat mengendalikan soal-soal hidup manusia baik di dunia maupun di akhirat.

Dasar ekonomi yang benar-benar sesuai dengan kejadian manusia yang dicipta khas oleh tuhan *Rabb al-Jalil* selaku pengatur Yang Maha Mengetahui segala keperluan dan kehendak-kehendak manusia. Maka sudah tentu sistem ekonomi sosialisme Islam (*Islamic Socialism*) dapat menandingi, mengatasi, malah dapat mencabar segala sistem ekonomi kapitalisme dan sosialisme lain.

Sosialisme Islam memang satu dasar sosialisme yang bertimbang rasa, yang menjaga hak-hak kepentingan orang ramai di samping meraikan hak-hak perseorangan, ini telah ditegaskan oleh ayat-ayat Qur'an, hadith-hadith Nabi dan muamalat orang-orang Muslimin di zaman yang silam.

Ketegasan sosialisme Islam adalah berdasarkan kepada faktor-faktor yang berikut:

1. Sistem milik yang rapi.
2. Sistem pengusahaan bersama.
3. Sistem pembahagian bersama terhadap barang-barang keperluan.
4. Galakan dan penghormatan yang tinggi terhadap nilai-nilai kerja.

## Sistem Ekonomi...

5. Memusuhi sikap melampau-lampau kebendaan (*material*).

### 1. Sistem milik yang rapi:

Yang dimaksudkan dengan sistem milik yang rapi di sini ialah bahawa agama Islam tidak mengizinkan seseorang itu memiliki sesuka hati mereka yang menyebabkan harta bertimbun-timbun di sisinya sahaja. Sedangkan orang lain hidup di dalam keadaan melerat dan kemiskinan memagari seluruh alam penghidupan mereka. Susah untuk mendapat sesuap pagi dan sesuap petang. Maka untuk mengelakkan dari hal ini, Islam mengharamkan terus dasar monopolii yang diamalkan oleh setengah golongan dalam sistem ekonomi bebas. Islam memberi garis-garis hak milik yang bebas. Islam tidak menyekat kaum pemodal-pemodal, Islam tidak merosakkan perusahaan mereka, selama mereka itu menghormati peraturan-peraturan yang boleh merosakkan kemaslahatan dan kepentingan orang ramai, selama mereka itu menggunakan modal-modal perusahaan untuk kepentingan bersama bukan untuk diri sendiri sahaja.

Sebab mereka itu adalah selaku wakil yang terpilih yang diperserahkan oleh Allah untuk menguruskan soal-soal ekonomi, untuk mengurus segala bahan-bahan dan kejadian alam bagi kepentingan dan kesenangan manusia.

Ingin!! Bahawa harta kekayaan adalah merupakan satu pemberian Tuhan untuk seluruh makhluk-Nya, setiap orang yang memiliki harta kekayaan hendaklah tahu tanggungjawab dan

tempat letaknya. Andainya jika harta kekayaan itu diletakkan pada tempat yang munasabah dan sesuai bagi tujuan, maka bahagia dan nikmatlah tuannya. Tetapi sebaliknya pula jika harta kekayaan itu diletakkan pada tempat yang tidak munasabah atau tempat yang tidak sesuai bagi tujuan, maka celakalah padanya.

Islam telah memberi amaran kepada orang-orang yang mempunyai kekayaan yang membawa kecelakaan kepada dirinya sendiri, iaitu kekayaan yang merupakan belenggu penipuan kepada tuannya “harta adalah bagi kita selama ia itu berada di tangan kita, tetapi sebaliknya pula kalau ia terlepas dari kita, maka kita bertanggungjawab dengannya”. Sebuah hadith Rasulullah ada begini! Wahai Tuhanku!

Bersabda yang maksudnya lebih kurang hidupkanlah aku dengan keadaan miskin, dan matikanlah aku dengan keadaan miskin, dan himpukanlah aku bersama-sama golongan orang-orang miskin.”

Dalam Islam ada beberapa konsep yang dapat menyelamatkan manusia dari sifat kekayaan yang menjadi celaka kepada tuannya. Zakat umpamanya: Zakat cuma diwajibkan ke atas orang yang benar-benar cukup syaratnya ada pun orang yang tidak mampu untuk membayarnya maka dilucutkan sahaja dari kewajiban mengeluarkan zakat.

Kebanyakkan zakat yang diambil di dalam Islam ialah seperti zakat fitrah (zakat badan) zakat tanaman, zakat peniagaan, galian, binatang dan zakat harta simpanan. Dari sistem zakat yang diwajibkan oleh Islam itu, tidak nampak sebarang alamat

untuk menjalankan dasar monopolii dalam Islam, tidak ada peluang langsung untuk memusatkan ekonomi kepada seseorang sahaja. Malah zakat adalah merupakan alat yang utama untuk menghapuskan sistem pemodal yang tidak bertanggungjawab terhadap hak orang-orang lain. Zakat juga suatu kewajiban ke atas kaum-kaum kapitalis yang pasti ditunaikan oleh mereka kepada masyarakat. Ini jelas sekali ternyata dalam tindakan Sayyidina Abu Bakar terhadap mereka yang ingkar dan tidak mahu mengeluarkan zakat pada masa pemerintahan baginda.

Sistem zakat tebus-menebus (*kifārāt*) dan segala kebajikan-kebajikan yang lain dianjurkan oleh Islam, bukan sahaja untuk mengelakkan dari adanya golongan kapitalis dan feudalis dalam Islam, malah lebih jauh dari itu. Peneropongan yang dilakukan oleh Islam ke atas manusia memang baik dan sangat cermat sekali, Islam menghormati nilai-nilai manusia, Islam memuliakan taraf dan kedudukan manusia lebih dari segala-gala yang lain. Malah dijadikan segala makhluk yang lain itu ialah semata-mata untuk faedah dan kesenangan manusia.

Oleh kerana itu maka sangatlah sesuai Islam menganjurkan kepada tuan-tuan punya harta supaya mereka itu membelanjakan harta kekayaannya untuk faedah dan kebajikan orang ramai, Tuhan telah berfirman sebagaimana maksudnya: “Hendaklah membelanjakan orang-orang yang mempunyai kekayaan dari kekayaannya, barang siapa yang sempit (sedikit) rezekinya, hendaklah membelanjakan mengikut yang diberikan Allah kepadanya. Allah tiada memberati diri seseorang, melainkan menurut yang